



Phau Taw Qhia Tus Mob





Zoo siab tos txais koom BHPN!

Pawg Tu Kev Nyob Zoo Ntawm Sab Siab Ntsws (The Behavioral Health Provider Network, the BHPN) zoo siab tos txais koj lawm. Koj uas yog tus mob, niam txiv, los yog tus saib xyuas tus mob tau txais Phau Taw Qhia Tus Mob vim tus mob yuav txais kev kuaj kev kho ntawm ib tug kws kho mob uas koom BHPN li pawg kws kho mob.

Qhia Txog BHPN

BHPN yog ib pab kws kho mob uas BHPN tib zoo xaiv. Pab kho mob no yog cov kws tu kev nyob zoo ntawm sab siab ntsws thiab cov kho ib ce kom meej xeeb li qub. Lawv siv tej txujci kho uas luag tau ua pov thawj tias txi txiv zoo es lawv txawj kho cov uas tsis meej xeeb lawm tsis hais cov yau cov laus huv tibi. Lawv haj yam pab tau cov uas muaj Autism Spectrum Disorder (ASD).

BHPN mauj tshaj li 90 kws kho mob uas nrog koom tes thiab cov no txawj kho ntau hom mob ntawm sab siab ntsws, suav txog kev kuaj thiab hloov kev xyaum (applied behavior analysis, ABA), kho cov mob kom txawj ua haujlwm li qub (occupational therapy), kho cov mob kom txawj siv lub cev li qub (physical therapy), thiab kho mob kom txawj hais lus (speech therapy).

Pawg BHPN nrhiav ib tug kws kho mob uas nrog koom tes uas phim tus mob thiab nws tsev neeg. Tus kho mob yuav kuaj, kho, thiab tu ntawm sab siab ntsws raws li tus mob yuav tsum tau. Peb txhawb nqa tus mob thiab nws tsev neeg rau lub caij kuaj kho no.

BHPN Lub Hom Phiaj

Muaj BHPN los pab hloov tibneeg txojkev xav thiab kev to taub txog tej mob uas ua rau neeg tsis meej xeeb lawm. Peb xav hloov tibneeg lub neej kom zoo zuj zus luag thiaj pom meej lawm. Peb txhawb kom peb cov kho mob siv zog kho kom zoo zoo, kev kho thiaj txi txiv zoo ua rau tus mob txaus siab npaum li yuav txaus siab tau.



Peb Tes Haujlwm Zoo Thiab Lub Koob Lub Npe

BHPN tau ntawv lees lub koob npe ntawm Lub Koom Haum Pov Thawj Rau Cov Tsev Tshaj Lij Tu Kom Rov Muaj Zog (Commission on Accreditation of Rehabilitation Facilities, CARF). Ntawv lees lub koob lu npe no uas kav li peb xyoos thiab yog ntawv lees lub koob lub npe theem siab tshaj uas CARF muab. Daim ntawv no yog CARF ua timkhawv tias BHPN tej kev kuaj kev kho tau txog theem uas ntau lub tebchaws suav tias zoo tshaj. CARF yog ib lub koom haum uas ua haujlwm tsis tau tshaj thawj thiab nws txheem nws xwb. Nws lub luag haujlwm yog nrhiav txoj hau kev ua rau kev kuaj kev kho zoo zuj zus tuaj txhua fab kom haum cov mob lub siab nyiam thiab txi txiv zoo.



BHPN tej hom phiaj yog kho tau zoo, rhawv kev kho tshiab, thiab ua haujlwm zoo txog theem siab heev. Peb muab siab hloov txojkev kho kom zoo zuj zus tuaj thaib ua rau tus mob txaus siab tsis tu ncua. Cov kho mob thiab cov txhawb nqa lawv huv tibi uas nrog BHPN ua haujlwm tau kev cob qhia ua ntu zus. Lawv kawm tej yam uas cov kws kho mob tau tshawb fawb tshiab, tej txujci kho uas cov tiam no siv, thiab kawm paub txog ntau haiv neeg kom to taub lawv tej kev coj noj coj ua.





Phau Taw Qhia Tus Mob Thiab Txog Lub Koom Haum

Phau Qhia Tus Mob Txog Cai yog qhia txog BHPN tej kev kuaj kev kho thiab kab lig kevcai. Ob yam no pab peb txwaj ua haujlwm rau koj. Peb muab Phau Taw Qhia Tus Mob rau tus mob ua ntej yuav pib kev kuaj kev kho. Peb xav txhawb kom koj siv phau no ua twj nrhiav tej koj xav paub thaum koj txais kev kuaj kev kho ntawm peb.

Hauv Phau Taw Qhia Tus Mob no, koj yuav nrhiav tau lus qhia txog

- Koj Pawg Kho Mob
- Tej Qauv Kho Mob
- Tej Kab Lig Kevcai

Thaum Koj Muaj Lus Nug

Yog koj muaj lus nug, cia li tiv tauj BHPN Tus Tubtxib Pab Dhia Kev Kho uas pab koj lossis 855-the-BHPN. Peb xav kom cov mob, niam txiv, thiab cov saib xyuas txhua tus to taub tias kev kuaj kev kho ntawm BHPN cov kho mob yuav hloov cov tsis meej xeeb siab ntsws thiab kev xav lub neej kom zoo zuj zus - thiab haj yam yuav pab cov muaj ASD.

Ua Li Cas Ntxiv?

KAUJ RUAM 1: Nyeem Phau Taw Qhia Tus Mob no.

KAUJ RUAM 2: Tus Mob, nws niam txiv lossis nws tus saib xyuas yuav tsum sau ntawv tso cai ua ntej tau kev kuaj kev kho.

TSEEMCEE:

Hauv Phau Taw Qhia Tus Mob no mas koj yuav pom duab teeb thiab lo lus "Pab". Tej Kev Pab sau tseg hauv Phau Taw Qhia Tus Mob no muaj tej tswvyim pab thiab tej txujci uas niam txiv yuav tau siv pab menyuum tiag tiag.



Tej Lus Tseem Ceeb

Tus Mob

Yog ib tug uas tau kev kuaj kev kho ntawm BHPN.

Koj

Lo lus "Koj" uas siv hauv phau no yog hais txog tus yuav tau kev kuaj kev kho (tus mob) thiab tus mob niam txiv lossis saib xyuas.

Tus Saib Xyuas

Ib tug uas muaj cai sawv tus mob chaws txiav txim siab txog kev kho mob. Tus no yog niam txiv nkawd ib tug lossis dua ib tug uas muaj cai txiav txim txog kev kho mob rau tus mob, xws li pog yawg.



Lauj sijhawm nyeem Phau Taw Qhia Tus Mob no. Tej yam sau hauv phau no tseem ceeb. Lauj sijhawm nyeem kom tas thiab khaws tseg rau koj rov saib dua.

Kuv Txais Kev Pab Txhais Lus Puas Tau?

BHPN thiab cov nrog koom tes kho mob yeej siv cov txhais lus rau cov neeg mob thiab lawv tsev neeg. Yog koj xav tau kev pab txhais lus, cia li thov kev pab ntawm leejtwg los hauv koj pawg kho mob.


Qhia Txog Peb Txojkev Kuaj Kev Kho

Ib feem ntawm tus mob li qauv kho mob yog kuaj tus mob ua ntu zus thiaj paub tias tus mob yuav tsum tau kev pab ntawm sab siab ntsws li cas thaum ntawd. Qhov uas niam txiv lossis tus saib xyuas koom nrog kev kuaj no yog ib feem tseem ceeb heev vim rau qhov peb yuav tau nug lawv txog tus mob thiab nws li qauv kho mob. Peb kuj yuav nrog lawv tham tias thaum twg yuav xaus lossis hloov tus mob li txojkev kuaj kho.

Kev Kuaj Kev Kho Yog Dabtsi?

- Yog ua ib ntus xwb
- Yog siv los pab kawm tau tej txujci thiab tej twj uas yuav pab tu autism lossis lwm hom mob ntawm sab siab ntsws
- lub caij tseem ceeb rau tus mob thiab nws tsev neeg kawm txuj
- nyias yuav tau kev kho txawv nyias rau txhua tus mob uas tau kev kuaj kev kho ntawm BHPN

Tus Txheej Txheem Kho



Thawj Zaum Kuaj

BHPN Tus Tubtxib Pab Dhia Kev Kho yuav kuaj thawj zaug los kawm tias tus mob yuav tsum tau kev tu lub siab lub ntsws li cas ces nws yuav nrhiav ib tug kws kho ntawm sab siab ntsws uas phim tus mob thiab nws tsev neeg.

Npaj Tus Qauv Kho Thiab Kev Tshuaj Xyuas

Tus kws kho mob koom BHPN yuav tsa tej hom phiaj kho mob rau tus mob, npaj tus qauv kho mob, thiab nrog tus mob, niam txiv, thiab/lossis tus saib xyuas txuas lus txog tus qauv kho ntawd.

Kev Kuaj Kev Kho

Thawj ntu kuaj kho ntawd yuav siv kwvlam li rau lub hlis. Thaum kho mob, tus kws kho yuav nrog tus mob siv tej txujci kho raws li tus qauv kho uas lawv tau npaj tseg thawj zaug uas kuaj. Thaum twg los tau, yog tus mob, niam txiv thiab/lossis tus saib xyuas tsis txaus siab txog kev kuaj kev kho, lossis xav tias tsis pab tus mob li, cia li qhia rau BHPN Tus Tubtxib Pab Dhia Kev Kho uas pab koj.

Kev kuaj kho no tsis yog yam uas yuav kav ntev. Yuav kho ib ntus xwb yus thiaj kawm tej txujci thiab tej twj kom txawj tu tej mob uas ua rau yus tsis meej xeeb ntawm siab ntsws. Peb suav tias kev kuaj kev kho no yog ib lub caij tseem ceeb rau tus mob thiab nws tsev neeg kawm txujci.

Kuaj Cuag Ncuu

Yam tsawg kuag txhua rau lub hlis Tus Kws Kho Mob yuav rov kuaj dua saib tus mob zoo li cas lawm. Thaum kuaj dua no, Tus Kws Kho Mob siv tib yam txujci qub kuaj uas siv thaum thawj zaug kuaj. Ua li no ces sawvdaws thiaj pom hais tias tus mob zoo tuaj txog qhovtwg lawm. Txhua zaum uas rov kuaj dua, sawvdaws yuav tham tias yuav xaus kev kuaj kho li cas lossis hloov kev kho rau dua ib hom.

Xaus Kev Kuaj Kho

Thaum ncav cuag hom phiaj kho tas lawm ces, yuav tau sib txuas lus tias yuav xaus thiab tsum kev kho mob li cas.



Txhob tsis nco teem caij rau koj tus menyuam mus raug kuaj kho.

Thawj zaug yuav mus kho mob, ces cia li xyuas saib tias koj tsev neeg niaj hnuv ua haujlwm dabtsi. Ua li no yus yuav paub seb puas yuav tsum hloov dabtsi thiaj tsis tab kaum kev kho mob.




Koj Pawg Koom Tes Pab

Txhua tus mob, lawv tsev neeg, thiab lwm tus uas paub lawv zoo yog ib feem tseem ceeb uas koom kev kuaj kev kho.

Cov txheeb ze thiab phoojywg kwvluag yog cov paub tus mob tshaj, thiab BHPN Tus Tubtxib Pab Dhia Kev Kho thiab Tus Kws Kho Mob lees paub qhov ntawd. Yog yuav kuaj yuav kho kom tau zoo ces, tseem ceeb tias cov saud koom tes nyias muaj nyias feem ntawm kev kho thiab yuav ua rau kev kho txi txiv tau zoo rau tus mob.

Pawg Koom Tes Pab uas muaj feem tseem ceeb rau kev kuaj kev kho no yog:





Tej Lus Tseem Ceeb

BHPN Tus Tubtxib Pab Dhia Kev Kho

Thawj tug uas tus mob thiab nws tsev neeg yuav tiv tauj yog muaj lus nug txog kev kuaj kev kho.

KP Tus Tubtxib Pab Dhia Num

Tus uas ua haujlwm rau Kaiser Permanente thiab txhawb nqa kom muaj kev koom siab koom tes thiab haujlwm zoo.

BHPN Cov Kws Kho Mob

Lub koom haum uas koom BHPN thiab kuaj kho thiab tu mob ntawm siab ntsws.

Caij Kuaj Kho

Lub caij uas tus mob yuav tau kev kuaj kev kho ntawm ib tug kws kho mob.

BHPN Tus Tubtxib Pab Dhia Kev Kho Dhia Kev Kho Li Cas

BHPN rau siab to taub tej uas tseem ceeb rau tus mob thiaab nws tsev neeg. Peb siv zog dhia num ntsig txog kev kho thiaj txhawb nqa koj txhua lub sijhawm uas koj raug kev kuaj kev kho.

BHPN Tus Tubtxib Pab Dhia Kev Kho ib tug raug txib pab tus mob thiaab nws tsev neeg es tus no yuav nrog lawv ua thawj tug lawv tiv tauj yog muaj lus nug txog kev kuaj kev kho, yam ub yam no txog lawv txojkev kho, lossis lwm yam lawv xav paub.

BHPN Tus Tubtxib Pab Dhia Kev Kho Pab Koj Li Cas?

TXHAWB KOJ

THAUM KOJ YUAV TAU MUAJ
KEV PAB NKAG SIAB TXOJ KAB
KE KHO MOB TEJ YAM UAS
CUAM TSHUAM RAU ASD THIAB
COV KEV TU



THAUM KOJ YUAV TAU
MUAJ KEV PAB NKAG SIAB
TXOG TIAS KUAJ POM KOJ
TUS MENYUAM MUAJ
LICAS THIAB COV LUS TEB
UAS CUAM TSHUAM TXOG
KEV TU



PAB HWJXWM KEV TU

YUAV TEEM SIJHAWM PAB HWJXWM
KEV TU NROG KOJ TUS KWS KHO
MOB THIAB LWM COV KWS PAB TU



YUAV PAB KOJ NRHIAV
KEV PAB LOS NTAWM
TXOJ KAB KE KAISER



MUAB KEV PAB

NTSIG TXOG
QHUV UAS
KUAJ POM
MUAJ LICAS
THIAB KEV TU



NTSIG TXOG TEJ YAM UAS
YUAV TAU MUAJ XWS LI KEV
PAB THAUJ MUS LOS, TSEV
NYOB, THIAB KEV PAB
THEM COV NQI UAS THEM
THAUM LIB SIJHAWM TUAJ
SIB NTSIB KIAG



LWM YAM UAS
THOV KOM TAU
XWS LI KEV
TXHAWB NQA, KEV
KAWM, KEV PAB
TSWVYIM, THIAB
LWM YAM



Koom Siab Koom Tes

Peb txhawb kom txhua hom kws kho mob koom tes ua haujlwm thiab sib qhia txujci kho. Yog vim koom tes li no BHPN thiaj muaj peevxwm pab cov mob thiab lawv tsev neeg ncav cuag tej hom phiaj kho raws lawv lub siab nyiam.

Lub tswvyim ntawm BHPN Tus Tubtxib Pab Dhia Kev Kho thiab tus mob Cov Kho Mob tseem ceeb, tiamsis pawg koom tes kho kuj yuav nug lwm tus uas paub tus mob, xws li ib tug xibhwb qhia ntawv los yog tsev neeg li kws kho menyuum. Pawg koom tes kho mob kuj xav hnov tswvyim ntawm tus mob thiab txhua tus uas tseem ceeb rau tus mob.

Tus Mob Lub Suab

Cov mob txhua tus nyias muaj nyias kev xav lawm ib yam. Cov mob qee tus tej thaum yuav tsis txawj qhia siab lossis hais ncav qha txog tej yam uas lawv xav tau. Hais txog lwm tus, lawv yuav nyuaj siab zoo siab chim siab kaj siab koj thiaj paub lawv txojkev xav, tiamsis lawv tsis siv lus hais. Tsis hais tus mob siv txujci twg qhia siab los, cov ua haujlwm rau BHPN ntseeg tias tseem ceeb ua luaj rau lawv mloog thiab quav ntsej tus mob thiaj paub nws siab. Lub caij uas tus mob raug kuaj raug kho ces, pawg koom tes pab yuav tib zoo mloog nws mus li. Rau cov mob muaj 12 xyos rov saud, BHPN thiab pab kho mob yuav suav tias tus mob txojkev xav thiab lub siab nyiam tseem ceeb tiag vim nws yog tus uas raug kuaj kho.

Qhov Uas Tsev Neeg Muaj Feem Tseem Ceeb

Tus mob yuav zoo zuij zus tuaj yog tau kev tu ntawm sab siab ntsws xwb, tiamsis lawv yuav haj yam zoo sai yog tsev neeg kub siab koom tes pab txhawb nqa kev kuaj kev kho. Qhov koom tes pab no tsis yog txhais tias yus mus kawm uas ib tug kws kho mob lossis ib tug pab kho mob. Tsev neeg thiab cov pab tu mob yuav tau pab tus mob muab tej txujci nws kawm thaum kuaj kho coj mus xyaum txhua hnuv. Ua piv txwv, yog ib tug tu mob ntawm sab siab ntsws tabtom pab tus mob kom txawj piav tej nws pom thiab hnov ces, thaum mus tsev ib tug ntawm nws tsev neeg yuav tau nyeem tej phau uas muaj duab rau nws mloog es thov kom nws taw rau yam ub yam no hauv phau.

Cob Qhia Tsev Neeg

Tus mob li pab kho mob uas BHPN txib yuav ua haujlwm rau tus mob, nws tsev neeg, thiab cov saib xyuas los txiav txim siab tias nyias yuav muaj nyias feem li cas thiaj ncav cuag tej hom phiaj kho mob. Tej Tug Kho Mob yuav cob qhia thiab xyaum kom tus mob thiab cov tu lawv txawj koom tes pab kho thaum tej caij kho thiab lwm lub caij huv tibi. Nqes tes pab tej thaum yuav suav txog kev qhia tias yus ua li cas los yog txhob ua li cas thaum tus mob chim siab kaj siab nyuaj siab tej.



Niam txiv thiab cov saib xyuas txhua tus yuav tsum to taub kev kuaj kev kho tag nrho. Tiag tiag, yuav pab yog sawvaws uas muaj feem koom tes pab tus mob yuav to taub tej kev kuaj kev kho tag nrho. Yog tus mob tau kev kho lossis kev cob qhia ntawm lwm Tus Kho Mob, cia li qhia BHPN Tus Tubtxib Pab Dhia Kev Kho uas pab koj nws thiaj paub tias tau kev kho dabtsi lawm.



Txhob ib leeg ua. Koom tej pawg niam txiv uas sib pab thiaj tau kev pab tsis hais online losis tim ntsej tim muag. Nqes tes nrhiav kev txhawb nqa ntawm phoojywg, txheeb ze, lossis cov ntseeg uas nrog koj mus pe hawm ua ke.

Kev Kuaj Kev Kho Yuav Zoo Li Cas?

Nyas muaj nyias lawm ib yam sib txawv. Yog li no tus mob uas BHPN pab yuav tau kev kuaj kev kho uas yog npaj rau lawv nkaus xwb thiab phim lawv. Yuav xaiv ib pawg koom tes pab txhua tus mob. Pawg no muaj lub luag haujlwm npaj ib txojkev kho rau tus mob uas phim lawv.

Kev kho no yog siv ib ntus xwb los pab lub cuab lub yig nyiaj dhau tej teeb meem uas lawv tabtom ntsib. Yuav rov pib kev kho dua tau rau thaum twg uas tus mob thiab nws tsev neeg yuav tsum tau kev txhawb nqa ntxiv.

Kev Kuaj Kev Kho

Kev Kuaj Thiab Hloov Kev Xyaum (ABA)

Ib yam txujci kho uas ib txwm siv rau cov muaj ASD yog ABA. Nws yog txujci kho uas cov tshawb fawb siv los pab hloov kev coj kev xyaum sab siab ntsws thiab kev xav. Tus kws kho yuav kuaj thiab npaj tus qauv kom hloov kev coj kev xyaum thiab hloov yam ub yam no hauv tus mob lub neej. Lawv yuav nqes tes ua ces rov qab kuaj seb zoo li cas lawm.

ABA yuav pab ib tug rau ntau txoj hau kev xws li:

- Pab yus kawm kom txawj sib txuas lus, ncawg luag, thiab kawm kom pab yus tus kheej.
- Pab kawm kom txawj quav ntsej tsi ntsees ua haujlwm li luag hais yus ua.
- Pab kom yus muaj siab ua haujlwm.
- Txo kev coj tsis zoo xws li qhov uas yus rov ua rau yus mob lossis nthe luag tawg ntho.
- Pab kom ncav cuag tej hom phiaj kho thiab kho raws li tus mob thiab nws tsev neeg xav tau.

BHPN Cov Kho Mob yuav siv txujci ABA kho tom tsev, ua pawg, lossis tom tsev kho huv tibsi. Txujci kho ABA yus ua tau rau ntau qhov chaws kom haum tus mob siab.



Tsom tus cwj pwm uas yus xav kom coj. Qhov uas siv tswvyim nrog ib tug menyuam uas npau taws txuas lus mas nyuaj. Niam txiv thiab cov saib xyuas coob tus tsis xav coj li ntawd. Ua piv txwv, peb xav siv tswvyim los piav thiab yuam. Tiamsis, yuav zoo dua los tsom ntsoov rau tus cwj pwm uas yus xav kom tus menyuam coj. Siv cov lus yooj yim li no tias "Thaum koj tsum tsis nthe lawm, peb yuav mus ua si tom lub vaj," yuav pab.



Rov tshuaj xyuas tej sijhawm teem los kho mob. ABA yuav tau siv sijhawm ntau. Koj tau sau Daim Ntawv Qhia Caij Nyoog Ua Ub Ua No tseg lawm. Ua tib zoo saib kom ruaj siab tias lub sijhawm uas cov kws kho mob tau teem rau nej lawm yuav zoo rau koj thiab koj tsev neeg.

Tej feem ntawm txujci kho ABA

Kuaj

Cov Kho Mob uas koom BHPN siv tej txujci kuaj raws kevcai los npaj tus qauv tu mob rau tus mob. Yuav tau kuaj li no ua ntej pib kho mob thiab yuav rov kuaj dua tas li thaum kho mob thiab paub meej tias kev kho no puas txi txiv thiab puas ncav cuag tus mob tej hom phiaj kho.

Kev Kho

Tus mob thiab nws tsev neeg yuav tau txais ib tug qauv kho mob uas phim laww ntawm ib Tug Kws Kuaj Kev Coj Kev Xyaum Raws Cai. Yuav siv tej yam uas tau kawm ntawm thawj zaug kev kuaj ABA thiab tej caij tau rov kuaj dua los npaj tus qauv kho no tseg. Yuav khaws keeb kwm tias tus mob tau kawm txujci li cas thiab coj li cas thiab yuav kuaj tej keeb kwm no mus li. Niam txiv, cuab yig thiab cov pab tu mob kuj muaj feem npaj thiab rov kuaj dua no.

Ib Leeg Kawm Thiab Kawm Ua Pawg Xyaum

Txujci kho ABA muaj kev kho tom tsev, ib tug qhia ib tug; kev Cob Qhia Niam Txiv; thiab ABA Ua Pawg Xyaum uas yog ob tug mob rov saud koom nrog ib tug kws kho sab siab ntsws rov saud los kawm koj txawj ncawg luag thiab txuas lus.

Niam Txiv Thiab Cuab Yig Koom Li Cas

Ib feem tseem ceeb ntawm txujci kho ABA yog cob qhia niam txiv, cov txheeb ze, thiab cov pab tu tus mob los paub yuav pab txhawb nqa tus mob txojkev kho thaum tej caij kho thiab tej caij tsis kho huv tibsi.

Ib Leeg Kawm Thiab Kawm Ua Pawg Xyaum

Tej txujci kho ABA muaj qhov uas Ua Pawg Xyuam thiab ua si los pab qhia cov mob kom txawj ncawg luag.

Txujci Ua Pawg Xyaum yog txhob txwm npaj tseg los pab cov menyuam hnuv nyoog mus kawm ntawv thiab cov hluas. Kuj muaj kev kho uas yog ib leeg kho ib tug.

Kho Mob Kom Txawj Ua Haujlwm Li Luag Tej

Kev kho no yog pab tus mob txawj siv cev ua haujlwm thiab txawj pab nws tus kheej. Tej txujci kho muaj suav txog xyaum ua tej haujlwm yus niaj hnuv ua hauv vaj hauv tsev thiab kev kho uas tus kws kho txhob txwm xaiv ib qho haujlwm ua zuj zus los pab kom txawj siv cev zuj zus.

Kho Mob Kom Txawj Siv Lub Cev Li Luag Tej

Kev kho no yog siv tej twj losis xyaum ncab cev los pab tus mob txawj siv cev thiab mus kev li qub. Kev Kho Kom Txawj Siv Cev Li Luag Tej no yuav pab tau tus mob kom txawj ua haujlwm thiab siv lub cev ua neej li luag tej. (Rho Los Ntawm: American Physical Therapy Association)

Kho Mob Kom Txawj Hais Lus

Kev kho no yuav pab thaiv, kuaj, thiab kho teeb meem ntsig txog kev hais lus, yam lus, nrog luag sib txuas lus, siv lub hlwb kom txawj hais lus, thiab tej teeb meem ua rau yus ceeblaj nqos mov thiab dej. Cov Kws Kho Kom Txawj Hais no yuav nrog tus mob pab kom txawj hais thiab siv nws cov lus zuj zus. Nws siv ntau yam txujci uas luag tau ua pov thawj tias txi txiv zoo los pab kho tus mob. Laww yuav tuaj kho hauv tsev thiab tom tej tsev kho mob.

Xaus Kev Kho

Lo lus xaus kev kho no yog txhais hais tias yuav tsis tas siv BHPN pab kho yus lawm ntxiv. Kev npaj kom xaus kev kho yog pib txij thaum tus mob pib hlo tau kev kho lawm. Tus mob raug kho tiav los yog xaus kev kho thaum ntu kho mob tiav lawm, thiab tus mob thiab nws tsev neeg paub txujci thiab muaj tej twj pab lawv tus kheej lawm. Ua li no tus mob yuav txawj zoo tuaj zuj zus txawm tsis tau kev pab ntawm peb los lawm.

Txawm li ntawd los, muaj qee zaus uas peb yuav tsum xaus kev kho ua ntej tau kho tus mob tiav lawm. Ua li no yog vim lwm yam, xws li lawv tsis tau ua raws li BHPN lossis lub koom them nuj nqe li kab lig kev cai, lossis yog tus mob thov kom tu kev kho los ntawm BHPN. Tej thaum peb kuj yuav xaus kev kho yog kev kho tsis mus raws li Cov Kws Kho Mob tau hom tseg, xws li thaum tus mob:

- Tsis muaj peevxwm nrog BHPN lossis Cov Kws Kho Mob sib txuas lus kom txhawb nqa kev kho uas txi txiv
- Pheej tsis tuaj koom tej caij kho mob cuag ncuu lossis hais ntau dhau lawm tias tuaj tsis tau hlo li
- Tsis tuaj kho ncuu 30 hnuv rov saud
- Txog lig tas li lossis mus tsev ntxov tas li
- Tsis teb thaum luag sim tiv tauj (hais txog xov tooj, email, thiab lwm txoj.)
- Tsis muab ntaub ntawv tso cai lossis ntaub ntawv qhia tias muaj cai saib xyuas tus menyuam raws li luag kom muab lossis lwm yam uas tab kaum kev kho
- Tsis kam yuav kev kho uas tus kws kho mob hais
- Qhia BHPN tias lawv tsis xav siv BHPN ntxiv lawm
- Tsis tsev deb tsis nyob hauv thaj tsam uas BHPN lossis Koom Haum Them Nuj Nqes duav rau thiab tsis muaj peevxwm rov qab mus tau kev kho ntawm thaj tsam uas tau hom tseg tau kev pab

BHPN pab cov mob, lawv tsev neeg thiab lwm tus npaum li pab tau los daws tej teeb meem ua ntej yuav xaus kev kho. Yog ua tau thiab koj tus Kws Kho Mob pom zoo lawm ces muaj qee zaus uas BHPN yuav pab tus mob nrhiav dua ib Co Kws Kho Mob los kho.

Yuav Tsum Paub



Hais Txog Kevcai Tebchaws

BHPN tsis tuaj ib tog twg thaum hais txog kevcai tebchaws thiab tsis koom daws teeb meem ntsig txog tus mob tej lus kom lus liam, tshwj yog thaum raug kevcai yuam kom peb koom.

Yuam Tsum Qhia Luag Raws Cai

Raws li Xeev California li txoj kevcai hu ua Kevcai Kom Qhia Luag Txog Menyuam Raug Txhom Raug Tso Tseg (Child Abuse and Neglect Reporting Act, CANRA), cov uas ua haujlwm rau BHPN yuav tsum maj qhia cheeb tsam li koom haum uas saib xyuas menyuam txojkev noj qab nyob zoo lossis cov tub ceev xwm thaum twg lawv paub txog, pom, lossis xoom xaim tias muaj ntsis li ib tug menyuam raug txhom raug tso tseg. Cov ua haujlwm rau BHPN kuj yuav tsum qhia thaum xav tias muaj tsev neeg sib ntaus lossis cov laus raug ntaus.

Koj Txoj Cai Thiab Lub Luag Haujlwm

BHPN thiab nws Cov Kho Mob ua ib siab los tsa tus mob li txoj cai txhua lub sijhawm, suav txog qhov uas cov kho mob uas koom peb ib txwm muaj tej ntaub ntawv cia kho mob raws cai, qhia cov koom haum saib xyuas cov kho mob, thiab hloov peb tej kab lig kevcai kom haum cai.

Koj Muaj Txojcai Raws Li No:

- Kom txais kev kuaj kev kho uas tsis txuam nrog luag hem koj, ua pauj, thuam luag, tso koj tseg, tsob nqi xiab nyiaj txiag ntawm koj lossis siv koj dog dig rau lwm seem.
- Kom txais kev kuaj kev kho vim koj xav tau lawm tiag.
- Kom txais kev kuaj kev kho uas phim koj hnuv nyoog, qhov uas koj yog txivneej lossis pojniam, qhov uas koj nyiam txivneej losyog pojniam, koj haiv neeg, koj txojkev ntseeg lossis kab lig kevcai, koj txojkev noj qab haus huv thiab koj qhov koj muaj zog npaum li cas.
- Kom tau luag qhia koj kom txaus ua ntej yuav pib kev kho hom twg los tau, koj thiaj muaj peevxwm txiav txim siab tau zoo.
- Txiaiv txim siab tsis yuav txojkev kho twg los tau tomqab luag qhia koj tias nws zoo qhovtwg, muaj lwm txoj hau kev kho twg, thiab yuav zoo li cas yog tsis yuav lawm.
- Kom tau luag qhia koj tsis qhia luag thiab qhia raws caij raws nyoog txog txojkev kuaj kev kho koj thiaj paub txiv txim siab zoo.
- Kom tau luag pub koj saib keeb kwm kho mob thiab lwm yam tseem ceeb raws caij nyoog koj thiaj muaj peevxwm txiav txim siab tau zoo, raws ib yam li tau sau tseg hauv Ntawv Ceeb Toom Txog Kevcai Khaws Siv Thiab Qhia Kuv Moo.
- Kom luag tsis pub leejtwg uas tsis tsim nyog saib koj tej ntawv keeb kwm kho mob raws kevcai thiab raws li tau piav tseg hauv Ntawv Ceeb Toom Txog Kevcai Khaws Siv Thiab Qhia Kuv Moo
- Kom luag tau piav rau koj txog cov kho mob npaum li tej kab lig kevcai koom haum thiab kevcai khaws moo xeev thiab tebchaws pub qhia.
- Kom tau luag muab tus kws kho mob uas yuav pab koj tej ntaub ntawv qhia tias muaj cai kho mob rau koj thaum koj thov saib.
- Kom tau hu rau BHPN Chav Tos Txais Cov Mob los qhia tias tsis txaus siab tias raug tsis ncaj thiab tsis tas ntshai tias yog ua li no yuav tau luag ua pauj lossis tau luag cheem tsis pub tau kev kho lawm.
- Kom tau luag qhia koj tias koj yuav qhia lub koom haum saib xyuas cov kho mob tias koj tsis txaus siab li cas thaum koj xav tias cov kho mob koj tsis ncaj.

Hais Lus Qhia Kev Tsis Txaus Siab

Tus mob, niam txiv, thiab cov saib xyuas muaj cai qhia kev tsis txaus siab thaum twg los tau, tsis tas ntshai luag yuav ua pauj. Thaum peb txais lus qhia tias tsis txaus siab lawm, BHPN cov neeg yuav siv zog pab daws teeb meem thiab nrhiav kev kom txhob tshwm dua ib zaug li.

Tej Kauj Ruam Yuav Rhais Yog Koj Tsis Txaus Siab

KAUJ RUAM 1

Thov kom ntsib nrog koj Tus Tubtxib Pab Dhia Kev Kho lossis ib tug saib xyuas. Feem ntau yog ua li no yuav txaus. Peb rau siab maj daws teeb meem kom tas. Yog tom qab koj nrog ib tug saib xyuas ntsib lawm koj tseem tsis txaus siab, cia li mus rau kauj ruam ob nram no.

KAUJ RUAM 2

Yog BHPN Tus Tubtxib Dhia Kev Kho tsis tau daws teeb meem lawm, **koj muaj cai sau ntawv tsis txaus siab xa mu rau BHPN Chav Tshuaj Kev Coj Ncaj** ntawm Quality@theBHPN.org lossis hu thiab piav tias koj tsis txaus siab li cas rau ntawm 855-the-BHPN (855-843-2476).

KAUJ RUAM 3

BHPN yuav koom tes nrog koj thiab pab kho mob daws qhov teeb meem raws kevcai thiab daws kom ncaj ncees. Luag yuav sau ntawv tuaj qhia koj tias lawv txiav txim rau koj tshaj plaub no li cas.

Koj kuj muaj cai hu rau Chav Kom Ua Raws Cai rau ntawm 1-833-44-PROTECT los qhia txog tias luag tsis ua raws cai.

Tej Lus Tseem Ceeb

Lus Qhia Kev Tsis Txaus Siab

Yog lo lus qhia tias yus tsis txaus siab txog yam tej yus ntsib ntawm BHPN.

Daim Ntawv Qhia Kev Tsis Txaus Siab

Txais tau daim no ntawm lub vej xaij theBHPN.org lossis thaum hu BHPN Chav Tos Txais Cov Mob rau ntawm 855-the-BHPN (855-843-2476).

Tso Cai Cia Peb Xa Keeb Kwm Kho Mob Uas Tiv Thaiv Khws Cia Twjywm (PHI) Thiab Ntawv Keeb Kwm Kho Mob Rau Cov Uas Thov

Yog koj sau Ntawv Tso Cai Qhia Cov Lus Qhia Txog Kev Kho Mob Uas Khaws Cia Twjywm (Protected Health Information, PHI) tas yuav cia BHPN xa koj li PHI rau dua ib tug lossis dua ib lub koom haum. Yog koj xav tau koj tej ntaub ntawv keeb kwm kho mob ces cia sau Ntawv Tso Cai Xa PHI kom tas. Koj txais tau ob daim ntawv yog xa email rau, hu rau, lossis xa tsab ntawv rau BHPN Chav Tos Txais Cov Mob thov kom xa tuaj. Yuav siv li 30 hnuv kom xa ntaub ntawv keeb kwm kho mob tiav.

Koj kuj rov thim tau lo lus tso cai xa PHI, tshwj yog:

1. Tej uas peb twb xa tas lawm vim koj tau tso cai lawm, lossis
2. yog tias (a) tau lus tso cai yog vim xav tau kev pov ntawm Isalas thiab (b) lwm txojcai cia lub koom haum Isalas muaj cai cav lo lus thim cai lossis cav tsis pub pov Isalas.



Ua Tus Tsav Xwm Nuj Nqe

BHPN xav kom tib neeg thiab lawv tsev neeg to taub meej tias lawv yuav them tej nuj nqes twg.

Koj yuav niaj hlis txais ntawv qhia nuj nqes ntawm BHPN, uas yuav piav:

- Kev kuaj kev kho (haujlwm ua thaum nyob thiab thaum tsis nyob) uas BHPN tau ua rau lub caij teem tseg hauv ntawv ntawd.
- Tej nqe koj yuav tsum them, xws li yus li feem ntawm tej nuj nqes (copays) thiab tus nqe them kom txwm (deductibles).
- Tias BHPN siv txoj hau kev twg txais nyiaj txiag (tshev, ntawv teem nyiaj (money order), thiab tej npav credit).
- Thaum twg yuav txais tej ntawv qhia nuj nqes.

Peb pab tau koj to taub tias koj yuav tau them tej nuj nqes twg ntawm koj kev duav kev kho mob los yog lwm txoj hau kev. Peb thov kom koj ua raws li no, raws li tsim nyog:

- Sau Daim Ntawv Ua Tus Tsav Xwm Nuj Nqe kom tas ua ntej pib kev kuaj kev kho.
- Qhia BHPN yog koj Lub Koom Haum Them Nuj Nqes tau hloov lawm.
- Them tus nqe uas tshwm yog sau tshev mus them BHPN tiamsis nrhiav pom tias tshev tsis zoo vim koj tus askhauj cov nyiaj tag lawm.
- Yog koj tsis muaj Isalas thiab koj tsis txais kev pab ntawm koom haum pov kho mob twg uas koom BHPN lawm, koj ua tus tsav xwm them tag nrho koj tej nuj nqes uas koj tau ntawm kev kho ntawm BHPN. Nov yog hais txog tej nuj nqes uas tau rau lub caij uas tsis muaj koom haum pov kev kho mob li.
- Cia li them tej nuj nqe uas koj tshuav rau caij rau nyoog xws li tej nqe copays, tej nqe deductibles, tej nqe tshwm ntawm qhov uas koj thiab Isalas faib nqes (coinsurance), thiab tej nqes uas tsis raug duav hlo li.

BHPN yuav ua li no los pab koj:

- Hu koj Thawj Lub Koom Haum Them Nuj Nqe kom tso siab tias lawv yuav them rau kev kho.
- Tau lus tso cai kho ntawm koj Thawj Lub Koom Haum Them Nuj Nqe.
- Xa ntaub ntawv rau koj Cov Koom Haum Them Nuj Nqes kom lawv them tej nuj nqes rau kev kho ntawm cov kws kho mob koom BHPN.
- Txais nyiaj them nuj nqes raws li koj Lub Koom Haum Them Nuj Nqes li Ntawv Piav Duav Nuj Nqes (Explanation of Benefits, EOB).

Koj Thawj Lub Koom Haum Them Nuj Nqes yuav ua li no los pab koj:

- Txais ntaub ntawv nuj nqes thiab xa cov nyiaj them rau peb.
- Xa daim EOB rau koj rau txhua daim ntawv qhia nuj nqes ua peb xa rau lawv. Daim EOB no tsis yog ntawv qhia nuj nqes koj yuav tsum them; Nws yog daim uas piav tias koj yuav txais kev pab them nuj nqes li cas thiab feem uas koj yuav tsum them yog li cas.

Koj Lub Koom Haum Them Nuj Nqes Lub Ob yuav ua li no los pab koj:

- Koj yuav tau muab ntaub ntawv ua pov thawj tias koj li Isalas hom ob yuav duav kev kho. Ua piv txwv, yog hais txog Anthem Blue Cross peb yuav tsum tau duab ntawm koj li npav Isalas ob sab tibsi. Yog hais txog MediCal, peb yuav tsum tau pov thawj tias lawv yuav duav kev kho mob los yog pov thawj tias yuav them nuj nqes (Verification of Benefits, VOB).

Tej Lus Tseem Ceeb

Thawj Qhov Isalas

Koj Thawj Qhov Isalas tej thaum yuav yog Kaiser Permanente, TRICARE, thiab lwm hom.

Isalas Qhov Ob

Koj qhov Isalas Ob tej zaum yuav yog Kaiser Permanente, Anthem Blue Cross, MediCal, Regional Center, and lwm hom.



Pab

Tib Zoo Saib Koj Cov Ntaub Ntawv Isalas Hais txog kev kho sab nraum kev sib ntsib - uas yog tes haujlwm uas tus kws kho mob ua thaum tus mob tsis nyob ntawd nrog nws, xws li thaum tus kws kho mob npaj tus qauv kho mob - tej thaum koj yuav tau them ib feem ntawm tej nuj nqes ntawd. Tiamsis qhov no nyob ntawm koj li Isalas, xws li yog koj muaj tus nqe them kom txwm (deductible) uas yuav tsum them tso.



Pab

Yog muaj lus nug txog koj li Isalas Kaiser Permanente, cia li tiv tauj Kaiser Permanente li Chaw Pab Tswv Cuab rau ntawm (800) 464-4000. Yog koj to taub tsis meej txog koj li deductible lossis co-pay, Chaw Pab Tswv Ciab yuav pab tau koj. BHPN tsis muaj cuab kav kev piav rau tus mob txog nws li Isalas kev duav kho mob.



Pab

Cia li siv BHPN li Qauv Them Nuj Nqes. Rau tej Isalas feem ntau yus muaj ib feem ntawm txhua caij kho mob uas yus yuav tau them, yog hu ua co-pay. BHPN li Qauv Them Nuj Nqes yuav pab koj npaj rau tej nuj nqes kho mob. Tseem ceeb rau koj to taub tias kev kho mob yuav raug nqe li cas ua ntej yus teem sijhawm mus kho mob.



Pab

Yuav tau xa ntawv ua pov thawj tias yus muaj Isalas hom ob los yog txoj hau kev them nuj nqes hom ob.

Ntawv Nug Seb Tus Mob Puas Txaus Siab

BHPN yuav xa ntawv nug seb tus mob puas txaus siab mus rau tus mob thiab nws tsev neeg. Peb siv cov ntawv no los pab peb paub tias yuav ua li cas kev kuaj kev kho thiab zoo zuj zus tuaj. Ib yam li tau piav tseg hauv Ntawv Ceeb Toom Txog Kevcai Khaws Siv Thiab Qhia Kuv Moo lawm, BHPN tsuas qhia moo lossis siv moo rau kev kho mob, them nuj nqes, thiab lwm yam ntsig txog kev kho mob, nrhiav nyiaj txiag txhim txhawb, lossis lwm txojkev uas txoj kevcai yuam kom ua. Lawv tsis siv koj moo kho mob rau lwm seem yog tsis muaj koj sau ntawv tso cai ua ntej. Nyob ntawm koj yuav sau ntawv qhia puas txaus siab xa rov qab rau peb los tsis xa. Qhov uas koj xa los tsis xa yuav tsis tab kaum tes haujlwm uas BHPN ua rau koj.



Cov Lus Tseem Ceeb

Nram no yog peb txhais cov lus uas siv ntau ntau hauv Phau Taw Qhia Tus Mob no rau koj.

BHPN Tus Tubtxib Pab Dhia Kev Kho: Thawj tug uas tus mob thiab nws tsev neeg yuav tiv tauj yog muaj lus nug txog kev kuaj kev kho.

BHPN Cov Kws Kho Mob: Lub koom haum uas koom BHPN los pab ua haujlwm kuaj kho thiab tu mob ntawm sab siab ntsws.

Tus Mob: Tus uas txais kev kuaj kev kho.

Kev Kuaj Kho Uas Luag Ua Pov Thawj Tias Txi Txiv: Kev kuaj kev kho ua a) yog luag tib zoo tshawb fawb tas lawm thiab b) yog luag ua pov thawj tias tau txi txiv zoo lawm.

Lub Koom Haum Them Nuj Nqes: Yog lub koom haum uas ua tus tsav xwm them ib feem ntawm tej nuj nqes lossis tej thaud yuav them tag nrho li tej nuj nqe tshwm ntawm kev kho ntawm BHPN.

Tus Saib Xyuas: Yog tus uas muaj cai sawv tus mob chaws los txiav txim siab txog kev kho mob. Tej thaum tus no yog niam txivib tug tiamsis kuj muaj qee zaus uas tus no yog dua ib tug xws li pog yawg.

KP Tus Tubtxib Pab Dhia Num: Tus uas ua haujlwm rau Kaiser Permanente thiab txawb nqa kom muaj kev koom siab koom tes thiab ua haujlwm zoo.

Tus Kws Kho Mob: Yog ib tug kws kho mob uas koom BHPN ua kev kuaj kev kho. Kev kuaj kev kho no tej thaum yog nrog tus mob ua lossis ua thaum tus mob tsis nyob ntawd nrog nws, xws li thaum ib tug kws kho mob npaj tu mob xws li qhov uas ua tus qauv kho mob.

Kev Kuaj Kev Kho: Txhua hom kuaj hom kho thiab kev tu mob uas ua rau tus mob.

Caij Kho Mob: Lub caij uas tus mob yuav tau kev kuaj kev kho ntawm ib tug kws kho mob.

Pawg Pab Dhia Num: Yog BHPN Tus Tubtxib Pab Dhia Kev Kho thiab KP Tus Tubtxib Pab Dhia Num. BHPN Tus Tubtxib Pab Dhia Kev Kho yog tus uas saib xyuas tus mob li qauv kho mob thiab dhia kev kho. Ob tug no koom tes los pab kom muaj kev kuaj kev kho raws li tus mob li qauv kuaj kho thiab pab txhawb kom ruaj siab tias tus mob zoo zuj zus tauj.



theBHPN

behavioral health provider network

2820 Shadelands Drive
Building 5, Suite 200
Walnut Creek, CA 94598

Xov Tooj: (855) 843-2476

Email: CustomerService@theBHPN.org

Vej Xaij: www.theBHPN.org | theBHPN  

Sijhawm Qheb: M-F 8:30am – 5:00pm

(Tej thaum tej tsev yuav qheb sijhawm txawv dua ib tsev)